

¡AMA EUSKARA!¹

(ON DÁMASO ZABALZA JAUNA-RI)

Euskal-kanta zar edercho aiyek kantaturikan
 Ama bat dago seaskachoan aldamenean
 Aur chikiyena lo dauka, eta gon egalean
 Dauzka azicho aiyek negarrez kuškuraturikan,
 Esanaz, ez da emen agiri lengo gauzikan;
 Zarrenak diyo, *Ama!* ¿ez giñan aberatsak len?
 ¿Ez algiñan gu emen ederki bizi pakean
 Saiyaturikan elkar maiterik geon lanean?
 Bada mintasun aundiya sartu zaigu barrunen,
 Ez diralako lengo gauz onak ikusten emen.

Orri argalak dauzka arbol zar maitagarriyak,
 Zartu da, eta gerritik dago okerturikan,
 Eta guk berriz gaitz egiñ eta lotsaturikan
 Dauzkagu malkoz bete betiak gure begiyak
 Ikusirikan zenbat min duben arbol gerriyak;
 Gure mendiyak išilik daude bere lekuan
 Eta ibaiyak ura dakarte òr òr egiñaz,
 Gu berriz gaude arnas lasaiya artu eziñaz,
 Euskal-kabicho chit mintsu eta negarrezkuan,
 Bizitza lasai zarra galdurik, bizitz estuan.

(1) Poesía premiada con *un objeto de arte* en los Juegos florales celebrados en esta Ciudad en 1890.

Bañan gauz onak galduagatik gu bizi gera
 Ill arteraño lagundu nairik gure amari;
 Ekartzen lengo gauza on aiyek gaišo onari,
 Baldin jokuan len bezelašen jartzen bagera.
 Naiz jokun orrek izan berekin bere galera,
 Biur gintezke ostera lengo kontuetara;
 Ez etsi iñork galdu gerala oso betiko,
 Euskar-ederra ez degu bada non nai utziko,
 Baizikan degu iyoko arbol adarretara
 Ekar ditzagun lengo oiturak eskuetara.

Itsaso eta mendiyak daude edergarritzat
 Arturik gure Euskal-erria erdi erdiyan,
 Bašaka eta larrosachuak berriz sasiyan,
 Eta aritza Fuero zarraren oroigarritzat
 Daukazkiela chit orri eze on, itzalkitzat;
 Gauz on asko da gorderik egon aritz azpiyan
 Daukazkiela lege zar eta *juramentuak*
 ¿Non dira bada, non dira gure aita prestuak?
 Ez da agiri zarrik iñorcho jaiyoterriyen,
 Ezkutatuak egongo dira nonbait agiyan.

Ez dira bizi aiton adintsu kaskazuriyak,
 Bañan ordean bizi gerade ondorenguak,
 Danok dakigu gerala aiyen odolekuak,
 Euskal-mendiyen artean jaiyo eta aziyak
 Gerade oso beren antzera ondo eziyak;
 Ots egiten du estalpechora arbol santuak
 Biltzeko danak euskal-oju bat aditutzean,
 Bada ez gaiten iñor gelditu otzak atzean,
 Chuka ditzagun ama zarraren negar malkuak
 Gal-etsi gabe utsegiñ arte zain odolsuak.

JUAN IGNAZIO URANGA.

